

研經室續集
二



研經室續集

二

阮元著

中華書局

擊經室續二集

卷二之下卷

王石臞先生墓誌銘

公諱念孫字懷祖號石臞先世居蘇州明初遷高郵州高祖開運州學生治尙書有聲曾祖式耜副貢生貧而行德以經授弟子祖曾祿拔貢生深于理學父諱安國雍正甲辰科會元第一甲二名及第官至吏部尙書諡文肅國史有傳公生四歲卽能讀尙書六七歲文肅公口授諸經皆成誦郡下有神童之目八歲屬文十歲讀十三經畢旁涉史鑑偶作史論斷制有識由是文肅教之以忠恕勿欺正直持身之道是公之學行早立於文肅公時戴東原先生當代碩儒也文肅延爲公師十四歲文肅歿公扶柩歸里童年老成學與行宿儒不逮也服闋補州學生員高宗純皇帝巡幸江南公以大臣子迎鑾獻文冊蒙恩賜舉人乙未曾試中式改翰林院庶吉士旣而乞假旋里謝絕人事居湖濱力學四載年三十七入都散館改工部主事主都水司事遂精心於治河之道由今河而上溯歷代治河諸書古今利弊無不通究爲導河議上下篇上篇導河北流下篇建倉通運年四十補主事陞營繕司員外郎製造庫郎中年四十五補陝西道御史明年擢吏科給事中又四年轉吏科掌印給事中在都前後十餘年凡錢局諸差及京察外任皆力辭俸滿保送知府自呈不勝外任論者嘉異之嘉慶四年仁宗睿皇帝親政之始公具疏勦宰輔某

是時不乏彈章。惟公疏援據經義。最爲得體。是以特蒙嘉納。疏中正論。至今人猶誦之。是年三月。命巡淮安漕。九月。又巡濟寧漕。盡裁陋規。道路所經。吏治民生。皆奏之。蒙聽納施行。十二月。授直隸永定河道。積弊一清。六年夏。大雨彌月。水漲二丈。高出于隄。南北岸同時溢。奉旨革職逮問。尋奉諭。水漫過蘆溝橋。面不但人力難施。亦非意想所到。王念孫加恩發河工出力。不但免其前罪。尚可酌量加恩。七年。奉旨督辦河間漫工。秋。賞六品頂戴。暫署永定河道。八年。奉諭。王念孫于水利講求有素。著加恩賞主事銜。留于直隸。令其周歷通省。遇有關涉水利事宜。悉心紀載。俟一二年後。交直隸總督彙奏辦理。公乃上總督顏檢書。臚舉畿輔水利章程。顏公據以奏。是年九月。河南衛家樓河決。奉旨。隨尙書費淳查看。且籌新漕。奉諭。王念孫于河務情形熟習。著卽馳赴臺莊。隨同吉綸辦理。旋奉旨。署山東運河道。九年。奉旨。給四品頂戴。實授運河道。在任數年。查工剔弊。節省數十萬。十五年。調直隸永定河道。召見。詢河務甚悉。甫旋任。東河帥請啓蘇家山閘。引黃入微山湖。以利漕運。召入都決。其是非。公對引黃入湖。不能不少淤。原非良策。但暫行無礙。並陳運河情形。皆詔行之。是年永定河水復異漲。如六年之溢。公自請治罪。奉旨。以六品休致。年六十有七矣。道光五年。八十二歲。奉上諭。王念孫年登耄耋。茲榜重逢。洵屬藝林嘉瑞。著加恩賞給四品職銜。准其重赴鹿鳴。以光盛典。十二年正月。公子引之官禮部尙書。以公病。奏給假。蒙賞假。召見。垂問。明年九十歲。且諭以服人侵之方。善爲調養。越數日。病重。諭引之等曰。吾受三朝厚恩。未能報稱。汝必盡。

心竭力以報主知。且諭諸孫曾服官讀書。以繼世德。遺命畢而卒。學者稱石臞先生。元于先生爲鄉後學。乾隆丙午入京謁先生。先生之學精微廣博。語元略能知其意。先生遂樂以爲教。元之稍知聲音文字訓詁者。得於先生也。先生初從東原戴氏受聲音文字訓詁。遂通爾雅說文。皆有撰述矣。繼而餘姚邵學士晉涵爲爾雅疏。金壇段進士玉裁爲說文注。先生遂不再爲之。綜其經學。納入廣雅。撰廣雅疏證二十三卷。凡漢以前倉雅古訓。皆搜括而通證之。謂訓詁之旨。本于聲音。就古音以求古義。引伸觸類。擴充于爾雅說文之外。似乎無所不達。然聲音文字部分之嚴。則一絲不亂。此乃藉張揖之書以納諸說。實多張揖所未及知者。而亦爲惠氏定宇戴氏東原所未及。古音自顧氏江氏戴氏皆有考正。金壇段氏分十七部爲益精。段氏之分支之脂爲三部也。發前人所未發。先生昔亦同見及此。因段書先出。遂輟作。然先生所分者。乃二十一部。東一。蒸二。侵三。談四。陽五。耕六。真七。諄八。元九。歌十。支十一。至十二。脂十三。祭十四。益十五。緝十六。之十七。魚十八。侯十九。幽二十。宵二十一。案之羣經楚辭。斬然不紊。其分至祭益緝爲四部也。則更顧段諸家之所未及。陸法言所未析者。先生又長於校讎。凡經子史書。晉唐宋以來古義之晦。誤。寫校之妄改。皆一一正之。著讀書雜誌八十二卷。分逸周書。戰國策。管子。荀子。宴子。春秋。墨子。淮南子。史記。漢書。漢隸拾遺。凡十種。一字之證。博及萬卷。折心解頤。他人百思不能到。子引之撰經義述聞。亦多先生過庭之訓。故高郵王氏一家之學。海內無匹。先生性方正。居官廉直。不受請託。自少至老。澹然以著。

述自娛處世接物。善善惡惡。皆出於誠。喜怒必形於色。人有一善一長。道之不已。生平學問之友。久而不渝。早年居鄉。與李君惇賈君田祖。汪君中。劉君台拱。程君瑤田。以古學相示。極一時之盛。教子幼。以朱子小學諸書。長。以經義。嘉慶己未科。元副朱文正公爲會試總裁。引之中式。以五策拔其萃。殿試一甲第三名。授翰林編修。道光八年。引之官至工部尙書。階光祿大夫。封公。官階如之。公配吳氏。贈翰林編修。鉉之女。孝慈勤儉。相夫教子。動中禮法。贈一品夫人。次子敬之。州學增生。孫八人。壽昌廩生。官戶部郎中。彥和。廣西鬱林直隸知州。壽朋。早歿。壽同。拔貢生。皆引之生。壽山。候選從九品。壽祺。學附生。葆和。葆定。皆敬之生。引之敬之。以道光十三年十二月庚子日。奉公柩葬于六合縣東北鄉東原王廟鎮之南原。癸山丁向。請儀徵阮元爲誌銘。

先生之貌。如石之臞。先生經濟。優于河渠。河患未已。乃阻厥謨。天逸先生。使著其書。先生學行。漢之醇儒。忠恕直誠。不飾不誣。古聲古訓。確證精疏。學深許鄭。音邁劉徐。萬卷皆破。一言不虛。續傳儒林。先生首歟。今歲在辰。歸葬于吳。佳城旣築。積善慶餘。

疇人利瑪竇傳論

自利瑪竇入中國。西人接踵而至。其於天學皆有所得。采而用之。此禮失求野之義也。而徐光啓至。謂利氏爲今日之義和。是何其言之妄耶。天文算數之學。吾中士講明切究者。代不乏人。自明季空談性命。不

務實學。而此業遂微。臺官步勘天道。疎闊彌甚。于是西人起而乘其衰。不得不矯然自異矣。然則但可云明之算家不如泰西。不得云古人皆不如泰西也。我國家右文尊道。六藝昌明。若吳江王氏。宣城梅氏。皆精於數學。實能盡得西法之長。而匡所不逮。至休寧戴東原先生。發明五曹孫子等經。而古算學明矣。嘉定錢竹汀先生。著廿二史考異。詳論三統四分以來諸家之術。而古推步學又明矣。學者苟能綜二千年來相傳之步算諸書。一一取而研究之。則知吾中土之法之精微深妙。有非西人所能及者。彼不讀古書。謬云西法勝于中法。是蓋但知西法而已。安知所謂古法哉。

疇人湯若望傳論

明季君臣以大統寢疏。開局修正。既知新法之密。訖未行。聖朝定鼎。以其法造時憲書。頒行天下。彼十餘年間辯論譁譯之勞。若預以備我朝之采用者。斯亦奇矣。夫歐羅巴極西之小國也。若望小國之陪臣也。而其術誠驗於天。卽錄而用之。我國家聖聖相傳。凡人行政。惟求其是。而不先設成心。卽此一端。可以仰見如天之度量矣。若望以四十二事表西法之異。證中術之疏。由是習於西說者。咸謂西人之學。非中土之所能及。然元旨博觀史志。綜覽天文算術家言。而知新法亦集合古今之長而爲之。非彼中人所能獨創也。如地爲圓體。則曾子十篇中已言之。太陽高卑。與考靈曜地有四游之說合。蒙氣有差。卽姜岌地有游氣之論。語曜異天。卽邳萌不附天體之說。凡此之等。安知非出於中國。如借根方之本爲東來法乎。蓋

步算之道。必後勝於前。有故可求。則修改易善。古法之所以疏者。漢魏之術。翼合圖讖。唐宋之術。拘泥演撰。天事微妙。而徒欲以算術綴之。無惑乎其術之未久輒差也。至授時去積年日法。不用一一憑諸實測。其于天道。已能漸近自然。然則由授時而加精。不得不密於前代矣。彼西人者。幸值其時耳。使生於授時以前。則其術必不能如今日之密。唐之九執。元之萬年。可證也。且西術之密。亦密於今耳。必不能將來永用。無復差忒。小輪之法。旋改橢圓。可見也。世有郭守敬其人。誠能徧通古今推步之法。親驗七政運行之故。精益求精。期於至當。則其造詣當必有出於西人之上者。使必曰西學非中土所能及。則我大清億萬年頒朔之法。必當問之于歐邏巴乎。此必不然也。精算之士。當知所自立矣。

曉人蔣友仁傳論

古推步家。齊七政之運行。於日躔曰盈縮。於月離曰遲疾。於五星曰順留伏逆。而不言其所以盈縮遲疾。順留伏逆之故。良以天道淵微。非人力所能窺測。故但言其所當然。而不復強求其所以然。此古人立言之慎也。自歐邏向化遠來。譯其步天之術。于是有本輪均輪次輪之算。此蓋假設形象。以明均數之加減而已。而無識之徒。以其能言盈縮遲疾順留伏逆之所以然。遂誤認蒼蒼者天。果有如是諸輪者。斯真大惑矣。乃未幾而向所謂諸輪者。又易爲橢圓面積之術。且以爲地球動而太陽靜。是西人亦不能堅守其前說也。夫第假象以明算理。則謂爲橢圓面積可。謂爲地球動而太陽靜。亦何所不可。然其爲說。至于上

下易位。動靜倒置。則離經畔道。不可爲訓。固未有若是甚焉者也。地谷至今。才百餘年。而其法屢變如此。自是而後。必更有於此數端之外。逞其私知。剏爲悠謬之論者。吾不知其伊于何底也。夫如是。而曰西人之言。天能明其所以然。則何如曰盈縮曰遲疾曰順留伏逆。但言其當然。而不言其所以然者。之終古無弊哉。

以上三論。在時人傳。今補錄入集。

隱屏山人陳編修傳

陳壽祺字恭甫。號左海。閩縣人。父鶴書。歲貢生。以文學主講仙遊龍巖邵武泉州漳州上杭書院。皆有經法。有詩集數卷。事實詳元所撰墓誌中。壽祺五歲。讀書易於成誦。舉止端重。性靜且敏。成童卽淹貫羣籍。一覽輒解。文藻博麗。有六朝三唐風格。其鄉先生陳秋坪謂之曰。當以千秋自命。勿爭名一時。年十八。值臺灣林爽文之亂。有海外紀事詩。見之者歎曰。此諸將嗣音也。洎嘉勇福公平臺凱旋。其參將郭公卽壽祺母之族叔祖。屬代撰上嘉勇公百韻詩並序。沈博絕麗。一時傳誦。稱爲才子。其序一篇。今刻集中。武進張惠言讀之曰。擬之燕許。何多讓焉。年十九。乾隆己酉。科舉於鄉。嘉慶己未。會試中式。賜進士出身。會試闈中。其卷爲人所遏。元言於朱文正公曰。師欲得如博學鴻詞科之名士乎。閩某卷經策是也。遏者猶摘其四書文中語。元曰。此語出白虎通。於是朱文正公由後場力拔出之。旣選館職。文正公愛其才。重視之。

在都下。以經術文章與同年武進張惠言、全椒吳璣、歙縣鮑桂星、高郵王引之、齊名。辛酉散館。授翰林編修。請歸省親。會元巡撫浙江。延主講杭州敷文書院。兼課詁經精舍生徒。元修海塘志。且纂經古義爲經郭。壽祺皆定其義例焉。癸亥冬入都。甲子典試廣東。丁卯典試河南。己巳會試房考。所得多知名之士。張岳松、劉光三其尤也。其衡文嶺南中州也。二三場遺卷一二萬。盡閱之。在都十年。恬然寡交遊。惟日以討論經誼爲事。同年數人知而愛之。相待如昆弟。又及見碩儒錢竹汀、段懋堂、王懷祖、程易疇諸先生。故學益精博。中嘗被公卿論薦。京察書上考。擬陪南書房。俄以丁父憂歸。時庚午歲也。初壽祺將以是歲逾告歸省親。未幾遽丁憂。星奔痛鉅。乃自悔其在都之非。其所述至今人不可卒讀。時年方四十。卽抱退志矣。服闋。陳情乞養母。主泉州清源講院者十年。與諸生言修身勵學。教以經術。多士奮興。一洗空疎之習。嘗正定清源書院先賢祀位。並率諸生增置祀產。以資祀事。奉朱子於東舍。從以先賢之傳道。而祀鄉學者明蔡文襄公、張襄惠公、次崖林氏、紫峯陳氏、紫溪蘇氏、慕蓼王氏、素庵林氏。國朝李文貞公。凡八君子位左右。扁曰先覺祠。爲之記。陷石壁間。丁母憂後。終於家居。主鼇峯書院講席者十一年。勅立規約。整肅課程。每月兼課經史文筆。其教士以崇廉恥、踐禮法、研經術爲尙。作義利辨、知恥說、科舉論。以示學者。士始畏其束縛。漸安之。久之悅服。不能忘。公卿間有以名薦者。終不出。計自丁父憂後。養母十年。去官二十餘載。里黨義舉多爲之倡。若省會文昌祠、大成殿、廡、明倫堂、恤嫠賑廠、貢院號舍。莫不首其議。

與諸同志成之。桑梓利弊。蒿目瘠心。往往直陳於大吏。冀獲挽救。雖間撓逆耳之怒。弗恤也。壽祺志在表揚先賢。以漳浦黃石齋先生之孤忠絕學。久欲請祀孔子廟。道光四年。遂偕紳士呈於督撫曰。明儒漳浦黃公道周。行完忠孝。學貫天人。著述本乎六經。節義與乎百世。建言直諫。斥佞黜邪。蒙難捐軀。詠歌弗輟。浩氣足以塞天地。正性足以扶綱常。其德業在梁溪考亭之間。其志節在文山青陽之列。其發明聖學。衛道宗經。大旨與劉公宗周相近。是以榕壇藪山。並峙宇內。非獨出處節概。兩相頡頏。今劉公既崇祀西廡。請並黃公從祀。以彰名臣之軌範。樹儒宗之圭臬。正人心而維世教。翼聖道而勵貞修。實有光於國家庠序之典。總督趙文恪公。巡撫孫文靖公。隨之。卽屬壽祺代撰疏稿。壽祺因謂明史黃道周傳贊。稱其所陳深中時弊。足爲萬世龜鑑。御批通鑑輯覽。紀其學行推重於天下。乾隆四十一年。特賜專謚忠端。其生平著述尤富。四庫採錄其書。多至十種。皆闡明經旨。推究治道。而尤深於易經孝經。其講學恪守朱子道脈。遂本此意成疏稿。督撫會疏。請從祀東廡。明年春。禮部議如所請。秋八月。大吏率文武吏奉主入祀孔子廟。時方鄉試。鄉士大夫及青衿千餘人。相從行禮。其扶翼名教如此。壽祺又以黃忠端公所著經解九種。及榕壇問業。或已著錄四庫經解。雖久經刊行。其餘遺書文集散見未及進者尙多。於是積十餘年蒐訪之力。購得易本象。鄰山講義。駢枝別集。大滌函書。及公門人石秋子洪思與莊起濤所撰黃子年譜。又得漳州士人藏本海澄鄭白麓中書所編公文集三十六卷。詩十四卷。又假得公季子子平所編公全集。

原本校對補遺數十篇彙成全集重定目錄輯爲六十六卷訂以年譜謀於總督孫文靖公刊布之閩省通志舊志多誤六十餘年文獻散失請加纂勒督撫從之壽祺乃爲之勗立議例採訪事實舉才者分任之而自總其成書成而病以道光十四年春卒年六十有四壽祺解經得兩漢大義每舉一義輒有折衷上溯伏生下至許鄭靡不通徹所著有五經異義疏證三卷尙書大傳定本三卷五行傳輯本三卷左海經辨四卷左海文集十卷左海駢體文二卷絳跗堂詩集六卷東越儒林文苑後傳二卷又著歐陽夏侯經說考魯齊韓詩說考禮記鄭讀考兩漢拾遺遂初堂雜錄元選其五經異義疏證左海經辨及文集中之說經者入皇清經解壽祺雅慕武夷山水紫陽精舍晚年自號隱屏山人作隱屏山人傳疾時不穀食卻醫藥惟日啜武夷巖茗噉柑柚少許枕上作絕句云夢想仙巖二隱屏問天應著少微星人間無此溪山好便欲乘雲上幔亭詞意愴悅若有所會子三喬樅道光乙酉舉人朝樞鴻棟喬樅等訃來滇請爲墓誌元不爲誌而爲之傳

論曰山人以強仕之年告歸養親可謂孝矣親終不復仕非如義之誓墓有所激也恬而已矣立身於道義之中而經學博通兩漢文章雅似齊梁其學行卓然傳矣以千秋自命不爭名一時秋坪之言諒哉

安事齋詩錄序

安事齋詩儀徵貴部仲符所作也仲符與元同爲秀才時卽相友以文學齊名丙午同爲朱文正師所

舉己酉又同進士榜。仲符春試。賦得草色遙看近卻無。有碧歸行馬外。青到濯龍隅。句都下傳誦之。朝考第一。分吏部。由考功主事。游陞正郎。覆校石經。考功爲綜覈名實之地。仲符執法不阿。日久怨積。因事爲人所傾。竟戍西疆。未幾賜鑲。恩鑒其無他。許復原職。旣而歸鄉養母。吟嘯湖山。故有況我南陔正絜養。不出非爲鱸魚饒之句。雖友人代納貲爲外道。恬然不復出矣。仲符政治明敏。所仕未展其才。文章壯麗。詞宏而力健。學博而識高。所爲詩。遇忠節之事。纏綿慷慨。見其性情。及用韓蘇韻如韜生馬蹴踏于山磧中。而彎弓奪稍。巧力兼到。甲午秋。公子正元寄遺稿至滇。屬元選訂之。歲寒窗紙。鐙火青熒。拭老眼讀之。淒然于青衿舊侶之久逝也。爲錄存大半。釐爲四卷。寄揚州付二弟梅叔梓之校之。乙未冬。

奏車里外域情形摺

奏爲查辦思茅土職滋事始末及外域情形恭摺奏祈聖鑒事。竊照思茅廳所屬車里土司刀繩武向其叔土舍刀太康攻閔不遵解息。先經奏革。嗣因其不知悔罪投歸。且又勾結猓夷。經弁兵捕拿。復帶印竄逃。現將所遺土職另行擇襲。另摺具奏外。臣等伏查滇省沿邊土司。悉係內地藩籬。土司之伯叔弟兄。皆爲土舍。各有分管之地。其土司舍目多與外域往來修睦。車里土境在西南極邊。其地約有數郡之廣。全境插八外域。東南鄰於南掌。西南鄰於緬甸。而暹羅所屬之部落戛于臘。又鄰其南境。內十三版猛地方。

分內猛外猛各立土弁分理。由土司統率。其中有荒遠悍野數處。卽不全服土司。嘉慶八年。經前撫臣奏明有案。刀繩武生甫兩月。卽父死承襲。全由伊叔刀太康撫養護理。迨刀繩武及歲婚娶。刀太康退爲土舍。分居外猛。與緬甸鄰近。相與修睦。因緬甸與戛子臘向來不和。南掌又與戛子臘親好。刀繩武不知避嫌。處置失當。偏向南掌戛夷。適有奸徒播弄。以致緬甸有疑。及刀繩武之事被擄入緬。土境乏人。曾以刀太康暫辦。至道光五年。內地曉諭緬國。始將刀繩武由騰越送回。仍充土司。因其與刀太康積有嫌疑。曾令弁目人等解釋。歸於和好。經前督撫臣長麟等奏明取結立案。迨後刀繩武因自緬歸。旣身欠緬債。復續欠漢債。被緬目遣人索取。欲向土弁商派未就。因而輕聽讒言。仇及其叔。遂謂蓄謀害姪。欲逐刀太康。全收外猛之地。於道光十二年冬間集練向攻。刀太康抵禦。致成互鬭。刀繩武潰回之後。許以割裂猛地。分酬幫附之諸奸。並寄字南掌及戛子臘之屬夷猛南等助兵未果。刀繩武又妄給裸夷。以土弁職銜擾及內地。且欲請官兵幫助。官不允助。遂縱使所糾之人。冒充難民。騷擾內地。人心搖動。非將其褫革。無以弭畔。迨至革後。尙令招諭自投。詎刀繩武又添聚裸夷。始終藐抗。不得不派弁兵攻捕。及至兵到。卡破練散。自行帶印潛逃。是刀繩武先之同室操戈。猶爲可恕。而後之糾結外夷。脅官跋扈。騷動內地。實屬罪無可逭。至刀繩武於互鬭後。以刀太康欺蒙款迹。撫飾辨稟。衿民亦代爲投呈請兵。經鎮道委員查明。均無實據。因叔姪互相怨望。衿民亦聽囑慫恿。此刀繩武肇畔諱飾。及漢奸附和干預之情由也。臣等查極

邊土司舍目俱常和外安內爲邊界屏藩。刀太康以極邊土舍尙知內地法度。此次衅起家庭。由於刀繩武先發。自不能深責刀太康。加之以罪。且暹羅與緬甸有仇。從前緬夏交攻。卽以車里爲兩戰之地。夷民逃散。近年始多安息。刀太康與緬人素和。而於南掌暹羅未甚款洽。前次夏于臘受刀繩武之唆。曾向刀太康詰責。嗣南掌進貢使目過刀太康之地。刀太康卽與之誓水盟和。意將由此通睦於夏夷。是刀太康輯睦外夷尙爲有術。緬國自乾隆三十年間屢侵內地。數爲邊患。致興經略大兵。勞費甚鉅。至乾隆五十三年。緬甸始請入貢。上年進貢遣使到滇。感仰皇上德威。臣等亦懷柔維厚。南掌上次入貢來滇。亦極馴謹。夏于臘屬於暹羅。近於南掌。今刀太康處於極邊。界於數國之間。先修睦於緬甸。今又與南掌盟和。夏夷與緬爲仇。而與南掌相親。可由南掌而推及夏夷。使緬夏之隙漸消。則土境亦可無牽擾之虞。乃刀繩武不知遵依前諭。和其骨肉。屢以私忿而先攻舍目。固知其必自蹈於潰裂。是以屢飭解息。假使因其蠻觸相爭。輕聽土司矜民之請。偏助以兵。逐滅其叔。則刀繩武不睦於緬。加以夏夷本不忘緬。而緬亦時防夏夷。夏夷終必有事於緬。緬亦必疑及刀繩武黨附南掌。豈不遷衅土境。兵連禍結。甚至涉及內地。致有不能收束之勢。是刀繩武之乖謬。追源竟委。何可曲徇任其僨事。今已褫革。所遺土職。刀氏世系寥落。但乾隆年間。前土司刀維屏帶印潛逃。雖投回監斃。亦不准其子承襲。茲若再以刀繩武之子議襲。無論事係違例。而現在各猛土弁尙許刀繩武之劣蹟。是子踵父習。更恐外患未至。內衅先生。自應照例於親支

內另行選舉。茲據鎮道等查稟。親支內惟刀繩武之父刀太和。與刀太康爲親兄弟。土弁目夷公舉刀太康之子刀正綜。繼與刀太和爲嗣。頂襲衆情允協。舍此別無可襲之人。則當以邊地安和爲重。未便以叔姪嫌疑。拘泥微節。以致另啓爭端。貽誤將來。況刀繩武被革。不投歸待罪。反攜印遠逃。自絕其子之襲。家屬法應另徙。與其伯祖刀維屏如出一轍。今爲其父刀太和立嗣繼襲。以延其祀。此已國恩加厚。無有偏抑。亦經飭令鎮道明白曉諭。以杜潛蹟之漢奸夷奸。妄生雌黃。搖惑生事。此又臣等與鎮道往返飭查。先後酌辦。期於邊地安和。免生各衅之緣由也。前次奏報。因有未經查出情節。尙未詳晰聲敘。茲已事竣。臣等謹將辦理始末各情形。恭摺奏聞。伏乞皇上聖鑒謹奏。

甲午

奏車里土司襲職摺子

奏爲已革土職遠逃未獲。地方安靜。撤回兵練。另擇襲職。以靖邊圉。恭摺具奏。仰祈聖鑒事。竊照思茅車里土司刀繩武。輕聽奸徒。播弄屢次集練。先向伊叔土舍刀太康鬩。抗不遵諭解息。甚至脅官求兵。偏助縱夷激畔。內地被其騷動。謬妄不職。當經奏明。將刀繩武土職褫革。如其知悔來投。按其情節酌辦。嗣因刀繩武仍不知悔。帶其隨練。復糾標夷多人。據山札卡。再向招諭。仍不解散自投。經該鎮道斥退。猥夷派令弁兵攻捕。刀繩武卡破練潰。帶印遠逃。又經奏奉諭旨。飭令鎮道委員追蹤緝拿在案。臣等因該處擾亂雖息。民吏多有流離。並令妥爲撫輯。再行次第酌撤防兵。其所遺車里土職。亦速查台例之人承襲。

去後。據普洱鎮邱奉岐。迤南道胡啓榮。委員林樹恆。錫麟。等稟稱。刀繩武攜印不繳。於潛逃後。由沿邊奔竄。分飭兵緝追拿。截獲附從漢奸王瀛等數人。刀繩武仍無下落。邊地荒曠。自己遠逃邊外。竄亡之餘。已不能再滋事端。不值令兵深入外域窮追。其所攜土印。亦難保無失落。且以已革通逃之人。即使執此廢印。亦屬無用。現在責令沿邊隘目。留心偵查去路。密爲購緝。並諭外域近邊土目。如有逃入。卽行拿送。另行稟報辦理。至土舍刀太康。本有分管之地。刀繩武聽讒猜忌。因與齟齬。前此互閔之後。刀太康遵諭解息。撤練退回。乃刀繩武結衅不休。頻結裸夷。漫入內境。騷動地方。自加調防兵。震以威勢。並於捕拿刀繩武時。先行斥散裸夷。始就安貼。現查所散裸夷。皆已歸其邊外原住山巢。被脅及逃亡夷民。分別招徠安撫。亦皆復業。料理春耕。除酌留本處防練外。將先調之目練及弁兵一千數百名。並續調之官兵千餘名。於正二月分起撤回。所遺車里土司世職。查定例土官緣事革職提問。不准親子承襲。另擇本支叔伯兄弟及兄弟之子繼襲。今刀繩武負罪帶印遠逃。其子例應停襲。以杜後衅。當卽諭飭車里所屬十三版猛各土弁人等。秉公選舉。查明刀繩武並無弟兄親支。惟其祖刀士宛生其父刀太和。與其叔刀太康。二人太和太康。係嫡親兄弟。止此兩支。此外遠支稀疎。亦多事故。無人可襲。刀太康現有二子。公議以親文士舍刀太康長子刀正綜。年已及歲。繼與刀太和爲嗣襲職。且同是刀士宛之親孫。夷衆亦皆悅服。無不踴躍各具保結。自應卽以刀正綜繼襲。俾刀士宛刀太和之世系不絕。而土境亦有責成。照例將宗陶冊